



Fundasaun Mahein

Komunikadu Imprensa

Relatóriu Peskiza kona-ba Feto nia Papél iha Rezolusaun Konfliktu Komunitáriu no Harii Pás iha Timor-Leste

Peskiza ida-ne'e deskobre katak feto sira iha Timor-Leste hala'o papél sentráal maibé barak liu informál – no, nune'e, la rekoñese – iha rezolusaun konfliktu no harii dame, ne'ebé opera liuliu liuhosi estrutura família no rede sosiál sira. Sira nia kontribuisaun sira maka preventivu no responsivu, kombina mediasaun iha momentu konfliktu nian ho esforsu sustentavel sira hodi rezolve motor subjacente sira hanesan estrese finanseiru no dependénsia ekonómika.

Hanoin xave ida maka feto nia influénsia dalabarak relasionál, indireta no deliberadamente diskretu. Duké depende ba mekanizmu formál sira hanesan autoridade lokál no polísia, mediador feto sira fó énfaze ba diálogu interpesoál enkuantu fó prioridade ba abordajen sira ne'ebé prezerva armonia sosiál no evita eskalasaun. Prátika sira-ne'e efetivu tebes iha kontestu lokál sira, partikularmente iha jestaun disputa sensível sira iha ne'ebé espozisaun públika bele hamosu prejuízu liután.

Iha tempu hanesan, feto sira-nia papél hetan forma hosi limitasaun estruturál sira. Norma patriarkál sira kontinua limita partisipasaun iha espasu sira foti desizaun formál nian, hodi rezulta iha padraun ida iha ne'ebé feto nia autoridade ezerse ho forma informál no dala barak la hetan rekoñesimentu. Ida-ne'e hamosu forma ida hosi "poder subar" ne'ebé maka sentráal ba estabilidade comunidade nian maibé barak liu la iha hosi enkuadramentu polítika no institusionál sira.

Deskobrimentu sira mós sujere katak prátika informál sira-ne'e refleto dinámika istóriu no sosiál ne'ebé luan liu. Fundasaun Mahein deskobre katak énfaze ba konfiansa, diskrisaun no jestaun konfliktu descentralizadu konsistente ho legadu sira

hosi prátika sira iha tempu rezisténsia nian, enkuantu norma jéneru kontemporáneu sira forma oinsá prátika sira-ne'e espresa no sé maka bele ezerse autoridade.

Importante mak feto sira iha Timor-Leste la'ós grupu ida ne'ebé omojéneu. Sira-nia abilidade atu kontribui ba harii dame varia depende ba koñesimentu, kapasidade ekonómika no influénsia sosiál. Ida-ne'e subliña importánsia atu hametin kondisaun sira ne'ebé feto sira bele atua ho efetivu, envezde asume katak sira-nia papél ka kapasidade hanesan.

Jeralmente, relatóriu ne'e hatudu katak harii dame iha Timor-Leste la'ós de'it iha instituisaun formál sira, maibé metin tebes iha moris sosiál no ekonómiku loroloron nian, ho feto sira hala'o knaar ida ne'ebé krítiku maibé ladún hetan rekoñesimentu atu sustenta dame no estabilidade iha nivel comunidade.

Rekomendasaun sira

1. Hametin Peskiza no Rekoñesimentu ba Harii Pás Informál

Iha nesesidade klaru atu hatán ba lakuna entre enkuadramentu polítika formál sira no realidade kona-ba oinsá jere konfliktu iha comunidade sira. Peskiza liután tenke hetan apoiu atu aprofunda komprensaun kona-ba prátika informál sira harii dame nian, inklui sira-nia dimensaun jéneru nian.

Ida-ne'e inklui:

- Dokumenta feto-sira nia papel iha rejiaun no kontestu, inklui sira-nia susesu no limitasaun sira.
- Analiza oinsá mekanizmu informál sira interasaun ho sistema formál sira
- Identifika maneira sira iha ne'ebé prátika informál sira bele informa polítika no programa sira

Rekoñesimentu boot liu ba papél sira-ne'e iha diskusaun polítika nasional no lokal sira sei ajuda aseguara katak estratéjia sira harii dame nian bazeia ba realidade moris comunidade sira-nian.

1. Hametin no Adapta Mekanizmu Bazeia ba Komunitade ne'ebé Eziste atu Reflete Feto sira-nia Papél Informál

Enkuantu bele iha valór atu institucionaliza aspetu sira hosi harii dame informál, ida-ne'e labele envolve nesesariamente kriasaun estrutura foun sira. FM nia análise sujere katak esforsu sira tenke fó prioridade ba hametin no adapta mekanizmu sira

ne'ebé eziste, envezde estabelese sistema paralelu sira ne'ebé risku ba duplikasaun ka sustentabilidade ne'ebé limitadu.

Feto sira-nia organizasaun no rede sira bazeia ba comunidade ne'ebé eziste tenke hametin no hetan apoiu, tanba barak kontribui ona ba prevensaun konflitu no koezaun sosiál no kolabora ho efetivu ho harii-dame informál sira.

Mekanizmu sira hanesan Konsellu Polisiamentu Komunitária (KPK) fornese ona plataforma ida ba jestaun konflitu iha nivel komunitáriu maibé hasoru limitasaun significativu, inklui:

- Falta orsamentu dediakadu, rezulta iha atividade sira ne'ebe la regula ka la sustetanvel
- Dependensia ba pastisipasaun voluntariu
- Integrasaun limitadu husi perspectiva sira jeneru nian

Atu rezolve limitasaun sira-ne'e presiza rekursu no adaptaasaun, inklui apoiu operasionál ne'ebé konsistente liu no integrasaun ne'ebé forte liu ho atór sira iha nivel comunidade.

Iha tempu hanesan, KPK no estrutura sira ne'ebé hanesan tenke hakat liu trata jéneru hanesan token ka ezijénsia prosedimentál no envezde ne'e integra ho significativu fetu sira-nia papél informál ne'ebé eziste, partikularmente iha relasaun ho prevensaun, mediasaun no koezaun sosiál. Ida-ne'e inklui kria espasu ba fetu sira-nia partisipasaun iha maneira sira ne'ebé aliña ho norma lokál sira no rekoñese valór abordajen relasionál, nivel família nian ba jestaun konflitu.

Etafa práttiku sira bele inklui:

- hametin ligasaun entre KPK no rede fetu sira hanesan kooperativa
- rekoñesimentu estadu nian ba jestaun konflitu iha nivel família nian hanesan komponente lejítimu ida ba harii dame iha comunidade
- autoridade lokál sira envolve fetu sira ho esperiénsia no influénsia sosiál ne'ebé hatudu ona iha prosesu mediasaun sira

Aprosimasaun sira-ne'e tenke evita atu impoin modelu partisipasaun esternu sira no envezde ne'e harii iha forma sira influénsia nian ne'ebé espesífiku ba kontestu ne'ebé presente ona iha comunidade sira.

Jeralmente, objetivu tenke atu halo ponte entre sistema formál no informál sira, hasa'e efikásia enkuantu prezerva fleksibilidade, konfiansa no sensibilidade kontestuál ne'ebé karakteriza fetu sira-nia papél informál harii dame nian.

2. Habelar no Suporta Empoderamentu Ekonómiku Fetu nian nu'udar Estratéjia Harii Páz

Deskobrimentu sira subliña empoderamentu ekonómiku nu'udar mekanizmu krítiku ida liuhosi ne'ebé fetu sira prevene konfliktu no hametin estabilidade família nian. Programa sira ne'ebé apoia fetu sira-nia asesu ba kréditu, literasia finanseira no atividade sira ne'ebé hamosu rendimentu, tanba ne'e, tenke komprende la'ós de'it hanesan intervensaun dezenvolvimentu maibé hanesan investimentu iha harii-dame no seguransa ba tempu naruk.

Apoi tenke foka ba:

- hasa'e modelu sira bazeia ba comunidade hanesan kooperativa sira
- hametin jestaun finanseira no abilidade negósiu nian
- liga inisiativa sira empoderamentu ekonómiku nian ba rezultadu sosiál sira ne'ebé luan liu, inklui prevensaun konfliktu

Programa sira-ne'e mós tenke dezeña atu reforsa fetu sira-nia kbiit atu foti desizaun iha uma-kain no comunidade sira-nia laran.

2. Hasa'e Konxiénsia no Envolvimentu Públiku kona-ba Igualdade Jéneru Liuhosi Abordajen Kontestualizadu

Enkuantu igualdade jéneru hetan promosaun luan no rekoñese hanesan relevante ba fetu sira-nia esperiénsia loroloron nian, deskobrimentu peskiza nian indika katak dala barak ema haree hanesan konseitu ida ne'ebé orienta hosi elite ne'ebé asosiadu ho programa tokenístiku ka superfisiál sira.

Atu rezolve ida-ne'e, intervensaun sira jéneru nian tenke:

- foka ba ezemplu prátiku, relasionável sira kona-ba igualdade jéneru iha asaun
- destaka benefísiu sira ne'ebé fahe ba família no comunidade sira
- envolve mane sira hanesan partisipante ativu iha mudansa

Hanesan nota hosi respondente ida, espozisaun sustentavel ba konseitu igualdade jéneru liuhosi kampaña no mídia bele hamosu mudansa iha komprensaun, partikularmente entre mane sira. Harii iha esforsu sira ne'ebé iha ona hosi sosiedade

sivil no instituisaun governu nian sira hanesan SEII, inklui divulgasaun ba comunidade no programasun média nian, bele ajuda tradús konseitu abstratu sira ba prátika sira ne'ebé iha impaktu iha comunidade sira nia laran.

3. Promove Abordajen Preventivu no Restaurativu ba Rezolusaun Konflitu

Preferénsia entre respondente sira ba prevensaun, de-eskalasaun no solusaun restaurativa sira sujere nesesidade atu reforsa aprosimasaun sira-ne'e iha sistema informál no formál nia laran.

Ida-ne'e inklui:

- apoia prátika mediasaun sira ne'ebé fó prioridade ba hadi'a relasaun sira
- enkoraja resposta sira ne'ebé graduadu ba konflitu, hahú iha nivel família no comunidade
- asegura katak intervensaun formál sira la aumenta disputa sira ho intensaun

Integra prinsípiu sira-ne'e iha enkuadramentu sira polisiamentu komunitáriu no governasaun lokál nian sei aliña aprosimasaun institusionál sira besik liután ho prátika sira ne'ebé eziste.